

吉水縣志卷之三十一

藝文志

記目錄

明

宋文丞相祠堂記

羅倫

濟渡菴記

徐穆

吉水吳侯興廢記

毛伯溫

正學書院記

羅洪先

戰馬記

羅洪先



吉水縣儒學尊經閣記

羅洪先

東溪記

羅洪先

石鐘山記

羅洪先

吉水縣重修儒學記

曾同亨

吉水縣新修城隍廟記

鄒元標

瞿圃記

鄒元標

徐公堤記

鄒元標

仁文書院記

鄒元標

文昌瀧江書院記

鄒元標

清補虛糧虛丁記

鄒元標

吉水荆壁陳侯新刻清匠冊記

鄒元標

胡氏義倉記

鄒元標

重建白鷺洲書院記

劉應秋

日月湖記

劉同升

義田記

羅大紘

郡邑兩侯優恤吉水縣馬夫碑記

李邦華

重修仁文書院記

李日宣

重修崇桂書院記

李世元

蕭瀧遊記

施士達

友烈祠記

又震孟

皇清

吉安二忠祠從祀先忠肅公記

李元鼎

青原山觀瀑小記

李元鼎

太平山種樹記

陳玉輝

重修縣堂記

王雅

鐘樓記

王雅

京口始事記

王雅

太平山遊記

徐 緘

創建陸公祠碑記

徐大坤

重興仁文書院碑記

徐大坤

石蓮洞記

施閏章

重修儒學大門記

金 渭

重修培元橋記

華 翊

培元橋葺會橋會記

胡世墉

補修劉文節先生專祠記

李一球

吉水縣志卷三十一

吉水縣知縣長沙周樹槐纂修

藝文志

記下

明

宋文丞相祠堂記

羅倫

爲臣死忠爲子死孝死一也可以動天地可以感鬼神
可以貫日月可以孚木石可以正萬世之人心位萬世
之天常孟子曰我善養吾浩然之氣以塞乎天地之間

夫殺身成仁舍生取義非浩然塞於天地之間者能與
於斯乎若宋丞相信國文公是矣公名天祥甫弱冠奉
廷對陳君道之大本經世之急務文思神發萬言立就
可謂天下之大才矣董宋臣主議遷幸公上章乞斬之
呂師孟偃蹇傲命公又上章乞斬之賈似道誤國要君
公當制以義裁之勤王詔下重臣宿將縮頸駭汗公提
孤兵獨往當之寇次臯亭三宮震動宰相遜荒公挺身
獨往說之可謂天下之大勇矣夫慷慨就義決死生於
一旦中人猶或能也若厯履萬死其執彌堅其志彌厲

非仁者其能乎方公之北使詆大酋詈逆賊當死脫京
口走真州如揚州趨高郵抵通州苗再成逐之李庭芝
疑之外迫於強寇內煎於饑饉無日而不當死然後遵
海道涉鯨波歸立二王開督南劍敗績於空坑仰藥於
潮陽絕粒於南安當死厯萬死而不死卒之就囚燕獄
從容南向而後死震動天地照曜萬世可謂天下之大
忠矣夫公之忠誠能墜空山之石能通七里之神能作
廣陵之風雨能起豺狼之敬悚而不能免賈似道之沮
黃萬石之疾李庭芝之疑陳宜中張世傑之忌何也蘇

子曰其所能者天也其不能者人也其斯之謂歟宋之亡也死國者多矣陸秀夫張世傑死於海李芾死於潭趙昂發死於池姚訔死於常趙世賞死於洪先君武岡公開禮死於吉安公制服哭祭之督府行朝死者不可勝數雖然死矣未有如公之出萬死而後死也微子之去箕子之囚龍逢比干之諫伯夷叔齊之餓諸葛武侯之鞠躬盡瘁備於公之一身矣自古亡國之臣未有如公之烈也收宋三百年養士之功立千萬載爲臣之極不在於公平非仁者之勇浩然而塞於天地之間者乎

公去今二百年順天祠公於學宮鄉郡祠公於城南公之子孫祠公於富田富田之祠元季兵變爲橫民所奪龍鳳間僉事李公飲氷復之正統間知府陳公本深繼之景泰間都憲韓公雍奏加謚號錄用子孫今上成化二年僉憲李公齡來掌學事以公九世孫繼宗入學俾公鄉人周丕憲割田贍之是皆有功於名教可書故書之以詔萬世之爲人臣者

濟渡菴記

徐 穆

昔者先王疆理天下百司庶務品式備具小水則梁大

水則舟於是病涉者咸賴焉蓋自黃帝堯舜作爲舟楫以濟不通自是以後講求區畫益精益密開物成務之道至矣盡矣我國家法古爲治大綱萬目纖悉無遺凡水限往來之處官爲造舟歲置守舟者一人若二人終日窮年艤泊兩岸以待涉者公私還往如履坦途卽地遠郡邑舊所無舟者細民私造以爲衣食之計亦時或有之上失顧募之恩下有需求之擾停舟中流索取其直不饜其欲不已本以利人而反爲病識治體者每爲之太息焉吾邑中鵠鄉里名張家渡舊名舍埠據吉郡

上游水出章貢南下兩岸居民輻輳百貨貿遷往往咸聚所謂地遠郡邑舊所無舟者此其一也里大姓張氏有諱冥淑者宋景祐間以左駙馬都尉家居造三舟以濟三津買田三十畝以給操舟者築室於周公塘連巷沿岡山諸處皆扁曰濟渡菴以分居之冲之劉丞相記其事可考也朝代遷革規制漸隳菴毀於火舟敝於水田奪於豪碑碎於牧豎敲擊風雨摧剝之餘所幸不亡而僅存者賴菴之遺址故在而鄉之父老尚能指示曰此張氏之先所謂濟渡菴也成化間封監察御史止齋

君四川按察副使介軒君父子一心力圖光復物色得側碑山田十餘畝爲景祐故物喜不自勝封君家政叢委憲副使節馳驅有志未就先後下世於是有遺恨焉正德丙寅憲副令子南漳儒學訓導自持偕兄自周自約弟自肅自孚自勉自正自重自修相與謀曰名茲地以吾姓者何著吾家之美也亦所以示不忘也今實去名存而吾等翫然安焉自今將有以鐵爐步見譏者吾等且奈何哉遂自誓曰所不能復吾舟與吾菴者有如此津乃伐木爲舟二割羅家橋腴田爲百畝歲入租百

斛半給舟人半貸鄉人爲造舟備闢惠祐淫祠遺址中
爲堂置義倉後爲室居舟人前爲門置牌亭著籍有司
爲義戶扁仍舊貫規制條約簡易明白使後人可守而
行無變更焉嗚呼何張氏前後之多賢哉前人不暇論
已今諸君子能慨徽聲於將替續義舉於方新其所爲
見旣高且遠斯豈祖考之獨幸門戶之私榮而已類而
推之則家庭敦孝友之行鄉曲長退讓之風通有無卹
患難百凡義舉肯靳而弗爲乎西京之治且最爲近古
然兼併武斷猶未免焉是舉也匪獨著張氏之美而國

家有道之長皇化無外之被雖閭閻編籍無官守民社之責焉者亦知隨分施仁克已爲義其過於西京何如哉故樂爲之記使凡於義已爲者弗替其終未爲者思儷其美而有官君子於扶偏起廢之道而無一弗備焉其爲民用之利豈少哉予因爲記茲菴而并以望焉

吉水吳侯興廢記

毛伯溫

蓀塘吳侯蒞吾邑三年德孚政洽人和歲豐乃以時興厥廢修城池之頽者內外共三千六百尺有奇城隈之樓五城之鋪十有二修儒學之青雲樓及肄業之舍若

干楹改修預備倉及門堂若干楹建彰善亭於邑門左
癉惡亭於邑門右保釐坊於二亭之間三元坊建於北
門之外橋建於石城之澣修大學士解公及大中丞熊
公祠修警舖十有八修郵舍十有六修者復舊建者鼎
新無藉於官無歛於民四境晏然百工子來夫城民之
衛也自朱侯寅肇之東南土堅西北瀕於江土且墟其
勢必頽是宜修倉所以養也舊在郊之北後遷於寺茲
以地窪是宜改修學所以教也自學舍廢而多士無致
道之地是宜修三元於學有光會元一狀元四解元十